

CONVENIO DE COLABORACIÓN ENTRE A CONSELLERÍA DE POLÍTICA SOCIAL E IGUALDADE E O CONCELLO DE VALGA, PARA A REALIZACIÓN DO PROXECTO DE ENVELLECIMENTO ACTIVO E PREVENCIÓN DA DEPENDENCIA E INNOVACIÓN SOCIOSANITARIA PARA O EXERCICIO 2025

Santiago de Compostela, 15 de maio de 2025.

REUNIDOS

Dunha parte, Fabiola García Martínez, conselleira de Política Social e Igualdade, actuando en nome e representación da Consellería, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia; no Decreto 44/2024, do 14 de abril, do seu nomeamento; no Decreto 42/2024, do 14 de abril, polo que se establece a estrutura orgánica da Xunta de Galicia, no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade, e no establecido no Acordo do Consello da Xunta de Galicia, do 27 de marzo de 1991.

Doutra parte, José Maria Bello Maneiro, en calidade de alcalde do Concello do Valga, con número de Identificación Fiscal P3605600J, e enderezo na Avenida da Coruña 14, Valga, tal como se reflicte na acta da sesión de constitución deste concello, que tivo lugar o día 17 de xuño de 2023, en uso das facultades que lle veñen atribuídas polo artigo 21 da Lei 7/1985, do 2 de abril, de bases do réxime local.

Intervenien en función dos seus respectivos cargos, e no exercicio das facultades que para convir no nome das entidades que representan teñen conferidas.

EXPOÑEN:

Primeiro.- Que o Estatuto de autonomía de Galicia encomenda aos poderes públicos galegos a obriga de promover as condicións para que a liberdade e a igualdade do individuo e dos grupos en que se integran sexan reais e efectivas, ademais de remover os atrancos que impidan ou dificulten a súa plenitude e de facilitar a participación de todos os galegos na vida política, económica, cultural e social.

Segundo.- Que a Comunidade Autónoma de Galicia, segundo o establecido no artigo 27.23 do Estatuto de autonomía de Galicia, en consonancia coas competencias outorgadas ás comunidades autónomas polo artigo 148.1.20 da Constitución española, ten competencia

exclusiva en materia de asistencia social, polo que, na súa virtude aprobouse a Lei 13/2008, do 3 de decembro, de servizos sociais de Galicia.

Terceiro.- Que a Consellería de Política Social e Igualdade é o órgano superior da administración autonómica ao que lle corresponden as competencias en materia de servizos sociais, e consecuentemente a atención do colectivo de persoas maiores, conforme ao Decreto 139/2024, do 20 de maio, polo que se establece a estrutura orgánica da Consellería de Política Social e Igualdade.

Que con carácter específico, lle corresponden, entre outras, a elaboración das políticas dirixidas ás persoas maiores en aplicación da Lei 13/2008, do 3 de decembro, e da Lei 39/2006, do 14 de decembro, de promoción da autonomía persoal e atención ás persoas en situación de dependencia. En particular, ten encomendadas as funcións relativas ao fomento e á promoción de actuacións e medidas favorecedoras da plena participación das persoas maiores na sociedade e da mellora da súa calidade de vida, así como todas aquelas accións que faciliten a súa promoción, integración social e participación activa.

Cuarto.- Que o Decreto 193/2011, do 6 de outubro, polo que se regulan especialidades nas subvencións ás entidades locais galegas, unifica os criterios nos procedementos de concesión, xestión e xustificación das subvencións ás entidades locais galegas para evitar disfuncións administrativas e inseguridade xurídica e establecer unha serie de mecanismos que teñan como principio inspirador a lealdade institucional nas relacións subvencionais entre a Administración autonómica e as entidades locais .

Quinto.- O concello de Valga está inscrito como entidade prestadora de servizos sociais co número E-541 e recoñecido como así se determina no art. 66 da Lei 13/2008 do 3 de decembro.

De conformidade co previsto na Lei 13/2008, do 3 de decembro, e na lexislación de aplicación sobre réxime local, correspóndelles aos concellos, no marco da planificación e ordenación xeral do sistema galego de servizos sociais, as seguintes competencias:

- a) A creación, xestión e mantemento dos servizos sociais comunitarios básicos.
- b) A creación, xestión e mantemento dos servizos sociais comunitarios específicos, sen prexuízo do establecido no artigo 59, punto i, da Lei 13/2008, do 3 de decembro.
- c) A colaboración no fomento dos servizos sociais prestados por entidades de iniciativa social, así como a promoción de mecanismos de coordinación das actuacións

realizadas polas mesmas, evitando no posible a duplicidade e infrautilización dos equipamentos sociais

- d) A promoción e realización de estudos e investigacións sobre a problemática dos servizos sociais no ámbito local e a divulgación dos resultados obtidos nos mesmos.
- e) A detección e análise das necesidades e da problemática social existente no seu ámbito territorial.
- f) A elaboración de plans e programas de servizos sociais no seu ámbito territorial, de conformidade co previsto no artigo 48 da Lei 13/2008, do 3 de decembro.
- g) A participación, como entidade colaboradora, na xestión das prestacións económicas e, no seu caso, nas subvencións concedidas pola Xunta de Galicia, nos termos legalmente establecidos.
- h) O fomento e promoción da solidariedade e da participación da sociedade civil na prevención e intervención social no ámbito local.
- i) A creación, regulación e impulso de mecanismos de participación local no ámbito dos servizos sociais.
- j) A coordinación dos servizos sociais cos restantes servizos municipais e das restantes administracións no desenvolvemento dos plans e programas de intervención comunitaria, facilitando a participación das entidades sociais e a implicación da cidadanía no proceso.
- k) Cantas outras lles estean atribuídas ou lles sexan delegadas, de acordo coa lexislación vixente

Estas competencias exerceranse polos concellos, por si mesmos ou asociados, ou a través das fórmulas de colaboración interadministrativa, a fin de alcanzar unha maior eficacia e rendibilidade social dos recursos dispoñibles.

Para a mellor atención das necesidades sociais do seu ámbito territorial, e unha vez garantida a prestación dos servizos sociais comunitarios básicos e demais competencias enumeradas no artigo 60 da Lei 13/2008, do 3 de decembro, os concellos de Galicia poderán crear, xestionar e manter servizos sociais comunitarios específicos, en coordinación coa Xunta de Galicia e de acordo co catálogo de servizos sociais e a planificación correspondente.

A Xunta de Galicia promoverá unha efectiva coordinación e cooperación cos concellos a fin de asegurar a calidade e unha cobertura equilibrada dos servizos sociais en todo o territorio, especialmente no que atinxe á creación e mantemento de servizos sociais comunitarios específicos.

Sexto.- O envellecemento activo é o proceso de optimización das oportunidades de saúde, participación e seguridade co fin de mellorar a calidade de vida a medida que as persoas envellecen. A importancia do envellecemento activo radica principalmente no seu propósito, pois coa súa aplicación preténdese mellorar a esperanza de vida da poboación maior a través de diferentes actividades.

O deterioro cognitivo aumenta conforme se envellece e polo tanto, envellecer de forma activa é fundamental para minorar ese deterioro e optimizar o estado físico, emocional, mental e social das persoas maiores.

O Concello de Valga conta con 1.880 veciños maiores de 60 anos, o que representa unha parte significativa do total dos seus habitantes, e xera a necesidade de que por parte do Concello se organicen actividades enfocadas a esta parte da poboación. Esta realidade faise máis patente ao considerar os indicadores de vulnerabilidade social da poboación maior, que reflicten elevados índices de soidade, pobreza e dependencia.

Nestes termos, resulta fundamental proporcionar ás persoas maiores deste concello un espazo no que poidan socializar e mellorar a súa calidade de vida. Ademais, a condición de municipio rural con poboación dispersa por todo o territorio fai que sexa máis complexo chegar a todas as persoas maiores. Por iso a importancia vital para todas estas persoas das actividades e cursos que conforman o Programa de envellecemento activo e prevención da dependencia e innovación sociosanitaria, que pretende levar a cabo o concello de Valga, programa que constitúe unha prioridade estratéxica para este Concello, no que se fomenta a interacción e a creación de vínculos sociais entre as persoas maiores e que xunto coa creación de espazos de encontro social e de integración, resulta esencial para mitigar os problemas de illamento deste colectivo e fortalecer o tecido comunitario.

O Concello de Valga ten o compromiso activo de contribuír a crear un sistema de apoio máis sólido e accesible para estas persoas maiores polo que a organización do Programa de envellecemento activo e prevención da dependencia e innovación sociosanitaria levarase a cabo coa contratación dun/ha técnico responsable da execución das actuacións que conforman o referido programa e poder mellorar a calidade de vida e unha maior cohesión e xustiza social para este colectivo e así responder ás súas necesidades.

O envellecemento comporta un aumento da vulnerabilidade física, psicolóxica, social e dixital das persoas, o que xera maior risco de chegar a situacións de dependencia, de perdas de apoio social e consecuentemente de exclusión. As actuacións do programa que se pretende subvencionar a través deste convenio están orientadas a mellorar a esperanza de vida saudable das persoas maiores, aumentando deste xeito a súa calidade de vida e previndo a aparición de deficiencias asociadas á idade. Na procura disto, artéllase a sinatura deste convenio para o financiamento, mediante a concesión dunha subvención directa, do xa mencionado Programa de envellecemento activo e prevención da dependencia e innovación sociosanitaria a través de actuacións que lles permitan ás persoas maiores do concello de Valga participar activamente na vida do seu entorno e coñecer novos lugares, evitar a soidade non desexada relacionándose con novas persoas e favorecer o seu benestar cognitivo, funcional, físico, social e emocional; programa que fomenta a participación, cooperación e comunicación na promoción da acción sociocultural do Concello deste colectivo, incluíndo a actividade física regular para preservar a súa autonomía ademais de facilitarlles información, asesoramento personalizado, formación e axuda cos trámites administrativos que deban realizar na súa vida cotiá e que se realizan maioritariamente a través de plataformas e aplicacións dixitais que supoñen, na maioría dos casos, unha barreira administrativa e dixital para aquelas persoas maiores que non están familiarizadas con estes procedementos.

Así o exposto e como xa se indicou, as razóns que motivan a concesión de forma directa desta subvención debido á dificultade da súa convocatoria pública, en base aos artigos 19.4c) e 26 da Lei 9/2007, do 13 de xuño, de subvencións de Galicia, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, radican na particularidade e exclusividade da entidade que desenvolve este proxecto que é o Concello de Valga, dada a extensión xeográfica e tratarse dun concello eminentemente rural, cunha enorme dispersión da poboación, un elevado número de persoas maiores, moi superior á media autonómica, unido á falta de recursos de atención ás persoas maiores nunha superficie superior a 40 km cadrados só conta cun centro de día e hai 84 persoas maiores coa dependencia resolta á espera dun servizo, polo que é necesario dende a Administración pública dotar de máis servizos para atender a estas persoas e facilitar a conciliación familiar en aras ao principio de proximidade na atención ás persoas, evitando o desarraigo prestando os servizos no seu entorno habitual en consonancia co establecido no artigo 31.2 da Lei 13/2008, do 3 de decembro, de servizos sociais de Galicia.

Sétimo.- Que ambas as dúas partes consideran de mutuo interese establecer fórmulas de colaboración para o financiamento de programas e actividades no eido da atención ás persoas maiores, especialmente no fomento da autonomía persoal, na prevención da situación de dependencia e no agravamento desta.

Por todo elo, as partes comparecentes, na representación que ostentan

ACORDAN

Asinar o presente convenio de colaboración en base ás seguintes

CLÁUSULAS

PRIMEIRA. *Obxecto*

O obxecto do presente convenio é outorgamento dunha subvención de carácter directo, para o financiamento, por parte da Consellería de Política Social e Igualdade, das actuacións que o Concello de Valga ten previsto desenvolver durante o ano 2025, de cara á realización do *Proxecto de envellecemento activo e prevención da dependencia e innovación socio sanitaria*.

SEGUNDA. *Actuacións subvencionables*

O *Proxecto envellecemento activo e prevención da dependencia e innovación socio sanitaria* do concello de Valga inclúe as seguintes actuacións:

1_ Xestión, coordinación e desempeño de diferentes actividades promovidas no Concello encamiñadas á xente maior:

Celebraranse dende o concello diferentes e diversas actividades para que as persoas maiores poidan participar. Estas actividades serán andainas organizadas, talleres de memoria, cursos de auto-coidado, clases de pintura. A tarefa do/a Técnico/a non se limita ao apoio nunha actividade específica, senón á súa participación en todos os cursos ou actividades que dende o Concello se vaian ofertando dirixidos a esta parte da poboación.

O calendario de actividades previstas é o seguinte:

- **Cursos de auto-coidado e relaxación:** andainas programadas semanalmente.
- **Talleres de memoria:** programadas dúas quendas semanais.
- **Campus Sénior:** clases de pintura programadas un día por semana.
- **Cursos de nutrición e saúde:** organizados cunha periodicidade trimestral.

- **Cursos de informática:** prevista a súa realización nos próximos meses, en función da dispoñibilidade das aulas e materiais necesarios para o desenvolvemento dos cursos. Programadas varias durante o ano.

2- Funcións de apoio na tramitación administrativa para participar en programas de envellecemento activo:

a) Difusión e información ás persoas usuarias de programas de envellecemento activo: O/a Técnico/a realizará unha labor activa de información e sensibilización, facendo chegar ás persoas maiores do Concello a existencia destes programas e explicando detalladamente os requisitos de acceso, os servizos incluídos e os beneficios que estes programas poden ofrecerlles. A través de charlas informativas, materiais impresos ou reunións presenciais, garantizará que todas as persoas interesadas dispoñan da información necesaria para tomar decisións informadas.

b) Asesoramento personalizado: O/a Técnico/a proporcionará asesoramento personalizado a cada solicitante, resolvendo as súas dúbidas sobre os requisitos de acceso aos distintos programas ou o proceso de inscrición. Tamén ofrecerá orientación sobre as condicións específicas que deben cumprir as persoas solicitantes, como a idade, situación económica ou médica, ou calquera outro criterio que establezan os programas.

c) Acompañamento na tramitación das solicitudes: O/a Técnico/a será responsable de axudar as persoas interesadas en todas as fases do proceso de solicitude, dende cubrir os formularios ata a súa presentación e rexistro dentro dos prazos establecidos. Supervisará que a documentación necesaria, como a identificación persoal, informes médicos, xustificacións de ingresos, entre outros documentos, estea completa e en orde.

3- Realizar funcións de apoio en trámites administrativos ou similares, que non entran dentro das funcións propias da persoa que desenvolve as tarefas de asistencia social no Concello, para axudar as persoas maiores con menos competencias dixitais na súa vida diaria é unha maneira moi importante de proporcionarlles apoio e asegurar que este grupo non se vexa excluído dos servizos que se ofrecen en liña. Dentro destes trámites, sinalamos, entre outros:

a) Trámites en liña: As novas tecnoloxías son unha realidade e hoxe en día a súa implantación na vida diaria tamén o é. A función do/a Técnico/a en relación con isto será a de dar soporte e proporcionar orientación e axuda en todo o que as persoas maiores que acudan ao Concello necesiten. Na maioría dos casos, esta parte da poboación non están familiarizadas coas novas tecnoloxías e, ou ben non teñen os medios nin os coñecementos

para levar a cabo trámites en liña, ou ben séntense inseguras, por medo a facelo mal ou cometer algún erro importante. Desta maneira, dáselles a posibilidade de que poidan realizar, a través de internet, moitos destes trámites utilizando ferramentas as que poden ter acceso pero que en moitos casos non utilizan por todos os motivos enumerados.

b) Apoio telefónico: Moitas persoas maiores prefiren o contacto telefónico, xa que non poden desprazarse ata o Concello, polo que organizar servizos de apoio telefónico para axudar a completar solicitudes e/ou facer consultas é unha boa alternativa para aquelas que non se senten seguras utilizando as plataformas dixitais.

c) Trámites relacionados co benestar e a saúde: Axudar a xestionar trámites administrativos relacionados coa xubilación, pensións, servizos de saúde ou axudas sociais tamén é crucial. Estes trámites a miúdo requiren dunha boa comprensión destes procesos polo que ofrecer axuda con estes trámites pode mellorar moito a calidade de vida das persoas maiores.

d) Resolver e aclarar dúbidas que poidan xurdirllas ás persoas maiores tras recibir cartas, documentos ou facturas pode ser fundamental, xa que a comprensión de certos documentos administrativos, facturas ou notificacións pode resultar lixeira ou totalmente confusa para alguén que non estea familiarizado co seu contido ou coas novas formas de xestionar estes trámites.

TERCEIRA. *Obrigas e documentación*

En virtude do disposto na Lei 38/2003, do 17 de novembro, xeral de subvencións e no Real Decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións; na Lei 9/2007, do 13 de xuño, de subvencións de Galicia, e no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, e no Decreto 193/2011, do 6 de outubro, polo que se regulan especialidades nas subvencións ás entidades locais galegas, o concello de Valga presentará previamente á sinatura do convenio o programa de actuacións a desenvolver no marco do convenio e a seguinte documentación:

a) Declaración comprensiva de todas as axudas e subvencións solicitadas ou concedidas para o mesmo proxecto, ou de ser o caso, unha declaración de que non solicitaron nin percibiron outras axudas ou subvencións.

b) Declaración responsable, suscrita polo representante da entidade, de non estar incurso nas prohibicións para obter a condición de beneficiaria de subvencións sinaladas nos apartados 2 e 3 do artigo 10 da Lei 9/2007, do 13 de xuño.

c) Declaración responsable do cumprimento da obriga establecida no artigo 4.1 do Decreto 193/2011, do 6 de outubro, en canto ao cumprimento do deber de remisión ao Consello de Contas das contas xerais de cada exercicio.

CUARTA. Orzamento

A previsión do orzamento de gastos para o desenvolvemento das actuacións que conforman o proxecto obxecto de subvención que ten previsto desenvolver o Concello de Valga é de 33.050,50€.

Segundo a Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, está previsto crédito axeitado e suficiente para poder dar cobertura económica aos compromisos contraídos en virtude deste convenio.

Para o cumprimento das actuacións descritas na cláusula segunda a Consellería de Política Social e Igualdade achegará **trinta mil euros (30.000,00€)**, que serán imputados á aplicación orzamentaria **08.05.312E.460.0** dos orzamentos xerais da Comunidade Autónoma de Galicia para o ano 2025.

O importe da subvención destinarase a cubrir os gastos de natureza corrente efectivamente realizados para o desenvolvemento das actuacións recollidas na cláusula segunda.

QUINTA. Obrigas da entidade beneficiaria

1. En cumprimento do disposto no artigo 11 da Lei 9/2007, do 13 de xuño, do Decreto 11/2009, do 8 de xaneiro e do Decreto 193/2011, do 6 de outubro, son obrigas da entidade beneficiaria:

a) Cumprir os requisitos para obter a condición de beneficiaria estipulados no artigo 10 da Lei 9/2007, do 13 de xuño.

b) Cumprir todos e cada un dos obxectivos, actividades e proxectos, adoptar os comportamentos que fundamentaron a concesión da subvención e cumprir os compromisos asumidos con motivo desta. Noutro caso, procederá o reintegro total ou parcial do importe concedido atendendo os criterios establecidos no convenio.

c) Xustificar ante o órgano concedinte o cumprimento dos requisitos e das condicións, así como a realización das actuacións e o cumprimento da finalidade que determinen a concesión ou o gozo da subvención.

d) Someterse ás actuacións de comprobación, que efectuará o órgano concedinte, así como a calquera outra actuación de comprobación e control financeiro, que poidan realizar os órganos de control competentes, tanto autonómicos coma estatais ou comunitarios, para o que se achegará tanta información lle sexa requirida no exercicio das actuacións anteriores.

e) Comunicarlle ao órgano concedinte a obtención doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, da Unión Europea ou de organismos internacionais, así como a modificación das circunstancias que fundamentasen a concesión da subvención. Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

f) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable á entidade beneficiaria en cada caso, así como cantos estados contables e rexistros específicos sexan esixidos polas bases reguladoras establecidas no convenio, coa finalidade de garantir o axeitado exercicio das facultades de comprobación e control.

g) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

h) Incluír na publicidade e en todo tipo de documentación e información relacionada coas actuacións obxecto do proxecto a subvencionar a través do convenio e nos lugares onde estas se realicen: "subvencionado pola Xunta de Galicia – Consellería de Política Social e Igualdade", co seu respectivo logotipo.

i) Proceder ao reintegro dos fondos percibidos nos supostos previstos no artigo 33 da Lei 9/2007, do 13 de xuño, e artigo 74 e seguintes do Decreto 11/2009, do 8 de xaneiro.

j) Presentar a documentación trala sinatura do convenio e no momento da xustificación parcial e/ou total, de conformidade co indicado na normativa de subvencións.

2. Asemade, o concello de Valga, en tanto que entidade beneficiaria dunha subvención, estará obrigado a subministrar á Consellería de Política Social e Igualdade, logo de

requirimento, toda a información necesaria para o cumprimento por aquela das obrigas previstas no Título I da Lei 1/2016, do 18 de xaneiro, de transparencia e bo goberno. No caso de incumprimento desta obriga estarase ao disposto no artigo 4.4 da citada lei.

SEXTA. Compatibilidade con outras subvencións

A subvención prevista neste convenio é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, nacionais ou internacionais, supere o custo total das actuacións -que vai desenvolver a entidade beneficiaria.

SÉTIMA. Forma de pagamento

Respecto ao pagamento e forma de xustificación da subvención estarase ao disposto na Lei 38/2003, do 17 de novembro, no Real Decreto 887/2006, do 21 de xullo, na Lei 9/2007, do 13 de xuño, Decreto 11/2009, do 8 de xaneiro, e no Decreto 193/2011, do 6 de outubro.

O libramento farase nunha conta corrente da que sexa titular o Concello nas seguintes condicións:

- a) Efectuarase un pagamento do 50% da totalidade da subvención, con carácter de anticipo a conta da liquidación, unha vez asinado o presente convenio.
- b) O 50% restante farase efectivo unha vez xustificada a correcta execución de todas as actuacións do proxecto subvencionado polo convenio e achegando a documentación indicada na cláusula sétima.

Para a tramitación das condicións de pagamento previstas nos apartados anteriores, a entidade beneficiaria da subvención queda exonerada da constitución de garantía ao entrar no suposto previsto no artigo 65.4.f) do Decreto 11/2009, do 8 de xaneiro.

Con carácter previo ao pagamento poderá consultarse, salvo oposición por parte da entidade beneficiaria, o cumprimento das súas obrigas tributarias, coa Seguridade Social e coa facenda da Administración Pública da Comunidade Autónoma de Galicia, así como non ser debedora por resolución de procedemento de reintegro. De opoñerse terá que facelo de xeito expreso tal e como sinala o artigo 28 da Lei 39/2015, do 1 de outubro, do procedemento

administrativo común das administracións públicas e achegar os xustificantes ou documentación necesaria para acreditar o seu cumprimento.

OITAVA._ *Gastos subvencionables e xustificación*

O importe da subvención destinarase a cubrir o gasto de persoal derivado da execución do proxecto obxecto deste convenio conforme ao establecido na memoria económica.

Son gastos subvencionables os que cumpran os requisitos fixados polo artigo 29 da Lei 9/2007, de 13 de xuño. Para estes efectos, considerarase gasto realizado cando se teña contabilizado o recoñecemento da obriga polo órgano competente da entidade local.

O concello de Valga está obrigado a acreditar documentalmente a efectividade dos pagamentos realizados de conformidade co establecido no artigo 3.1 do Decreto 193/2011, de 6 de outubro, a partir do ingreso na conta bancaria entidade de cada un dos aboamentos da subvención concedida.

O concello de Valga está obrigado a xustificar ante a Consellería de Política Social e Igualdade, o cumprimento do proxecto a subvencionar a través deste convenio, coa realización das actuacións e o seu custo real, mediante unha conta xustificativa integrada, con carácter xeral, pola documentación que se relaciona de seguido e que incorporará, en todo caso, a certificación da intervención ou do órgano que teña atribuídas as facultades de control da toma de razón en contabilidade do gasto efectuado e do cumprimento da finalidade para a que foi concedida a axuda.

Segundo o disposto no artigo 9 do Decreto 193/2011, do 6 de outubro, a conta xustificativa conterá:

a) Certificación expedida pola secretaría da entidade local, co visto e praxe do alcalde, relativa á aprobación polo órgano competente da conta xustificativa da subvención, en que se faga constar, como mínimo, de forma detallada:

1.º O cumprimento da finalidade da subvención, con especificación das actuacións desenvolvidas en execución do proxecto subvencionado polo convenio e dos resultados acadados.

2.º Os distintos conceptos e contías correspondentes aos gastos totais soportados pola entidade beneficiaria imputables ás actuacións subvencionadas coa seguinte relación: identificación da persoa acreedora, número de factura ou documento equivalente, importe, data de emisión e data de recoñecemento da obriga polo órgano competente. Non será

esixible a remisión dos documentos relacionados no artigo 48.2 b) do Regulamento da Lei 9/2007, do 13 de xuño, aprobado polo Decreto 11/2009, do 8 de xaneiro.

Tendo en consideración que o gasto imputable é de persoal, conforme ao establecido no orzamento do proxecto, deberá de concretarse aos efectos da súa xustificación e referida á mensualidade ou mensuralidades polas que se solicita a seguinte documentación:

- Relación nominal do traballador/a que se inclúen como xustificación do proxecto subvencionado.
- Recibos de salarios.
- Documento de relación nominal de traballadores (RNT) e documento de relación de liquidación de cotizacións (RLC) dos traballadores correspondentes aos meses imputados.
- Impresos de liquidación nominal do IRPF (modelos 111 e 190)

b) Unha relación detallada doutros ingresos ou subvencións que financiasen as actuacións que conforman o proxecto obxecto deste convenio con indicación do importe e a súa procedencia.

Asemade, xunto coa conta xustificativa, no caso de opoñerse á súa consulta, deberase achegar a declaración responsable do cumprimento das súas obrigas tributarias e coa Seguridade Social e de non ter pendente de pagamento ningunha débeda coa Administración Pública da Comunidade Autónoma de Galicia ou de ser debedor por resolución de procedemento de reintegro, segundo o disposto no artigo 11 do Decreto 11/2009, do 8 de xaneiro.

En todo caso o prazo da xustificación total da subvención deste convenio rematará o día **10 de decembro de 2025**. Cando formen parte da conta xustificativa documentos de gastos de nóminas ou que comporten ingresos á conta do IRPF ou cotas por seguros sociais de 2025 liquidables con posterioridade á data de xustificación, o importe destes ingresos ou cotas considérase xustificado coa presentación do documento de gasto, factura ou documento equivalente, no que se reflicta o importe da retención ou cotización devengadas na data de xustificación, quedando a entidade beneficiaria obrigada a presentar os documentos acreditativos da súa liquidación con data límite na primeira quincena de febreiro de 2026.

A falta de presentación da xustificación no prazo establecido comportará o reintegro da subvención, ou da parte proporcional non xustificada, e demais responsabilidades establecidas na Lei 9/2007, do 13 de xuño.

NOVENA. *Inexistencia de relación laboral*

Para levar a cabo os obxectivos e fins do proxecto o Concello poderá contratar, con cargo ao orzamento do presente proxecto, o persoal que no seu caso precise para o desenvolvemento das actuacións recollidas na cláusula segunda. Así mesmo queda facultado para designar o persoal necesario para realizar as actuacións propostas.

A subscrición do presente Convenio non leva consigo relación laboral nin contractual entre a Consellería de Política Social e Igualdade e as persoas que realicen as actuacións obxecto del, de tal xeito que non se lle poderá esixir ningunha responsabilidade, nin directa nin subsidiaria, polos actos ou feitos acaecidos no desenvolvemento do dito proxecto.

O Concello de Valga asume a responsabilidade respecto do persoal que asume as obrigas de levar a cabo as actuacións que conforman o proxecto recollido neste convenio.

DÉCIMA. *Incumprimentos, reintegros e sancións*

Producirase a perda do dereito ao cobro total ou parcial da axuda no suposto de falta de xustificación do cumprimento das actuacións a subvencionar a través do convenio, dos deberes contidos nestas cláusulas, dos deberes contidos no artigo 33 da Lei 9/2007, do 13 de xuño, ou na demais normativa aplicable, o que dará lugar á obriga de devolver total ou parcialmente a axuda percibida, así como os xuros de demora correspondentes.

O procedemento para declarar a orixe da perda do dereito de cobramento da axuda e para facer efectiva a devolución a que se refire o punto anterior será o establecido no Título II da Lei 9/2007, do 13 de xuño.

Sempre que se cumpran os requisitos ou condicións esenciais reflectidos no convenio, a Consellería de Política Social e Igualdade poderá apreciar un incumprimento parcial e deberá resolver sobre o seu alcance, aplicando a mesma ponderación que tivera a condición incumprida no convenio e, se é o caso, establecendo o deber de reintegro.

Cando se trate de condicións referentes á contía ou conceptos das actuacións que conforman o proxecto obxecto de subvención, o alcance do incumprimento determinarase proporcionalmente ao gasto deixado de practicar ou aplicado a conceptos distintos dos considerados subvencionables e, se é o caso, deberán reintegrarse as cantidades percibidas en dita proporción. Con carácter xeral, se o incumprimento superara o 65% do proxecto a subvencionar a través deste convenio, entenderase que dito incumprimento é total, e deberán reintegrarse todas as cantidades percibidas e o seus xuros de demora.

Á entidade beneficiaria da subvención regulada nestas bases seralle de aplicación o réxime de infraccións e sancións previstas no Título IV da Lei 9/2007, do 13 de xuño, de subvencións de Galicia e no Título VI do seu regulamento.

DÉCIMO PRIMEIRA. *Vixencia e efectos*

O presente convenio estenderá os seus efectos dende a súa formalización e terá vixencia ata o 31 de decembro de 2025.

Non obstante, os gastos das accións englobadas nas actividades do proxecto a subvencionar a través deste convenio que realizase o concello dende o 1 de marzo de 2025 tamén poderán ser subvencionados ao seu abeiro coa achega da Consellería de Política Social e Igualdade.

DÉCIMO SEGUNDA. *Obrigas de publicidade*

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia. Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes consenten dar publicidade dos seus datos persoais e demais especificacións recollidas no presente instrumento de colaboración no Portal de Transparencia e Goberno Aberto.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

DÉCIMO TERCEIRA. *Información básica de protección de datos persoais*

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de

estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Igualdade coa finalidade de levar a cabo a tramitación administrativa derivada da xestión da concesión directa a través deste convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos> derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia a publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarias os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que a cidadanía poida acceder de forma integral á información relativa a unha materia.

As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

DÉCIMO CUARTA. *Comisión de seguimento*

Para o seguimento e coordinación das accións previstas no presente convenio crearase unha comisión mixta e paritaria na que estarán representadas as partes asinantes do convenio. Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións estipuladas no presente convenio, e estará formada por dúas persoas representantes da Consellería de Política Social e Igualdade e dúas persoas representantes do Concello de Valga, designadas por cada unha das persoas representantes das partes, así como ás súas suplentes.

A persoa que ocupe a presidencia será unha das persoas representantes da Consellería de Política Social e Igualdade, designada pola persoa titular da dirección xeral competente en materia de maiores e atención sociosanitaria.

A persoa que ocupe a secretaría, que actuará con voz pero sen voto, así como a súa suplencia, será unha persoa adscrita á dirección xeral competente en materia de maiores e atención sociosanitaria, designada pola persoa que asuma a Presidencia.

Como órgano colexiado a comisión someterase ao réxime establecido na Lei 40/2015 do 1 de outubro, de réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

DÉCIMO QUINTA. *Réxime xurídico*

O presente convenio terá carácter administrativo rexéndose nos seus efectos polo establecido nas súas cláusulas, polo disposto na Lei 38/2003, do 17 de novembro; no Real decreto 887/2006, do 21 de xullo; na Lei 9/2007, do 13 de xuño; no Decreto 11/2009, do 8 de xaneiro, na Lei 40/2015, do 1 de outubro e no Decreto 193/2011, do 6 de outubro. No seu defecto, para resolver as lagoas e dúbidas que puideran presentarse, rexerase polo establecido na Lei 9/2017, de 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro do 2014.

As cuestións litixiosas xurdidas acerca da interpretación, modificación e resolución serán resoltas pola Consellería de Política Social e Igualdade poñendo os seus acordos fin á vía administrativa.

Contra elas cabe recurso potestativo de reposición ante o mesmo órgano que ditou a resolución, segundo o previsto no artigo 124 da Lei 39/2015, do 1 de outubro, se a

resolución fose expresa no prazo dun mes. Se o acto non fora expreso, poderá interpor recurso de reposición en calquera momento a partir do día seguinte a aquel en que se produza o acto presunto.

Directamente poderá interpoñer recurso contencioso - administrativo, no prazo de dous meses contados desde o día seguinte á notificación do acto que poña fin á vía administrativa, se fose expreso. Se non o fora, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Para tales efectos o tribunal competente será o Tribunal Superior de Xustiza de Galicia.

E en sinal de conformidade coas estipulacións do presente convenio, asínano as persoas comparecentes no lugar e na data da sinatura dixital.

Pola Consellería de Política Social e Igualdade

A conselleira

Fabiola García Martínez

Polo Concello de Valga

O alcalde

José Maria Bello Maneiro